

**■ COLUMNA**

# La barba da Roger Federer

DA BERNARD CATHOMAS

Quasi uschè fitg sco per sia prestaziun sin la piazza da tennis s'interessan las medias per la barba che Federer lascha crescer dapi in pèr dis.

I dat montaschas fotograficas che mussan cun umor tge che savess en il meglier u mender cas anc vegnir ord quai ch'ins vesa oz: in barbiss sco quel dal pictur surrealist Salvador Dalí, in schnuz sco quel da Giacun Hasper Muoth, ina barba plaina da signun u ina sco quella da Conchita Wurst.

Dunnas vegnan dumandadas tge ch'ellas pensan da la barba da sis dis da Roger Federer ed in summa dad umens cun barbiss u barba. Ina clera maioritad vul fattschas bluttas, finas. Mo per paucas decida la barba davart virilitad e «sex appeal». Ed ils umens fan mo beffas e «schnöss» da l'atgna barba e da quai che lur dunnas din da quella. «En tscherts moments decid jau mez», di in schizunt. Tut quai lascha supponer ch'i va per ina chaussa pli seriusa e cun ragischs bler pli profundas che quai ch'ins vul conceder. Ma da quai lasch jau pli gugent scriver ils psicologes.



I na barba croda en egl, in barbiss particular pir da dretg. I dat da quels che pretendan che quai na midia betg mo la fatscha, mabain l'entir um. Sco in outing, ina confessiun per ina nova identitad. Sco l'exempel Roger Federer mussa è l'attracziun tant pli gronda sch'in senza barba vegn in di cun – u er il cuntrari: in cun barba senza. Quai vesa mintgina e da quai discurra mintgin.

Jau enconusch umens che profiteschan da quella midada che dat da discurre per avrir ina discussiun sur da temas impurtants. Uschia per exempel quels che portan il november schnuz u barba per animar la discussiun sur dal cancer da la prostata ed autras malsognas. Questa moda vegn – tipic, u betg? – da l'Australia sur l'America e la Gronda Bretagna e stat

sut il num «Movember», ina cumbinaziun da «moustache» (mustazs) e november.

En «movember» stat er il pled «mover». Metter en moviment ina discussiun e sa mover per betg esser memia tard en cas da malsognas che sa laschan curar sch'ins vegn baud avunda. Movember dovra la barba per svegliar l'attenziun. Cun success. Sch'ins consultescha google sut Movember san ins mo surstar tge ch'ins sa cuntanscher sin quella via.

En ils matschs da tennis a la televisiun va la camera sur las retschas dals prominents: acturs, artists, politichers, sportists, funcziunaris, fitg bliers cun barbass e barbiss – e mintgin porta il ses cun dignitad u schizunt ina tscherta grondezza. Ins stuess cumparegliar il medem maletg cun in da l'avust per savair quants schnuzs han in messadi spezial en il senn dal movember.

Roger Federer na ha mintga cas betg tradì a las medias sche sia barba frestga ha in messadi spezial en il senn dal movember. Quai fiss festa per movember. E per el la satisfaziun che schizunt sia barba ha in grond effect per il bainstar da bliers.